


বিরল বাতাসের টানে


মোশাররফ হোসেন খান



বিরল বাতাসের টানে



বিরল বাতাসের টানে
মোশাররফ হোসেন খান



বাংলা সাহিত্য পরিষদ, ঢাকা .

বিরল বাতাসের টানে
মোশাররফ হোসেন খান

প্রথম প্রকাশ
অক্টোবর-১৯৯১
আখিন-১৩৯৮

বাসপত্র-২২
প্রকাশক
আবদুল মান্নান তালিব
পরিচালক
বাংলা সাহিত্য পরিষদ
১৭১, বড় মগবাজার, ঢাকা-১২১৭


বড়
নাহিদ জিবরান

প্রচ্ছদ
মোমিন উদ্দিন খালেদ

মুদ্রণে
ক্রিসেন্ট প্রিন্টিং প্রেস, ঢাকা

কম্পিউটার কম্পোজ
নীলি কম্পিউটার, ঢাকা

দাম
ত্রিশ টাকা মাত্র



BIRAL BATASHER TANE

A Collection of Poems by Mosharraf Hossain Khan


Published by Abdul Mannan Talib, Director, Bangla Sahitta Parishad

171, Bara Mohgbazar Dhaka-1217, Bangladesh.

First Print : October 1991

Price : Tk. 30.00

শ্রদ্ধাতাজনেষু
কবি আবদুল মান্নান সৈয়দ
অতির হৃদয়েষু
শিল্পী মোমিন উদ্দীন খালেদ



যত্ন কি সন্ধ্যার রং
কিবা জীবনের মতো
তমসিত বাতাসের ঘোড়া


লেখকের প্রকাশিত অন্যান্য বই

হৃদয় দিয়ে আগুন (কাব্য গ্রন্থ) ১৯৮৬

নেচে ওঠা সমুদ্র (কাব্য গ্রন্থ) ১৯৮৭

আরাধ্য অরণ্যে (কাব্য গ্রন্থ) ১৯৯০

প্রচ্ছন্ন মানবী (গল্প) ১৯৯১



কবিতা সূচী	এই সমতট সমুদ্র বিলাস/২৯
৯/লাশের কোরাস	ঘুমিয়ে পড়েছে রাত/৩০
১০/মধ্য যৌবনের কবিতা	স্বপ্নের সড়কে/৩১
১২/বীজের জীবন	বিধিত প্রতিভাস/৩২
১৩/হঠাৎ মধ্যরাতে	অচেনা আর্তস্বর/৩৩
১৪/পৃথিবীর ভবিষ্যত	প্রজন্ম এবং লাশ/৩৪
১৫/যাতায়াত	পাথর হাটছে/৩৫
১৬/দহন	জন্মান্তর/৩৮
১৭/মানুষ নক্ষত্র এবং গাথচিল	পালক ছাড়ার সময়/৩৯
১৮/ফেরেশতারা	মৃদুল তুফান/৪০
২০/জীবন ও বৃক্ষ	সময়/৪১
২১/অনন্তের ছায়াপথ	ভিজে মাটির ঘ্রাণ/৪২
২২/অলীক কংকাল	পিতামহের চেয়ার/৪৩
২৩/প্রাচীন শ্যাওলার মস্তক	নিদ্রামগ্ন পংক্তি/৪৪
২৪/ইতিহাসের বাড়ি	কঠতাল/৪৫
২৫/দুর্বিনীত হরিণের শিং	মৃত্যুর দিকে/৪৬
২৬/খসড়ার প্রতিবিম্ব	বিরল বাতাসের টানে/৪৭
২৮/মহাশূন্যের বারান্দা	শেষ রাতের জার্নাল/৪৮

লাশের কোরাস

কোথায় যাচ্ছে মানুষ, কোথায়?

বৃত্তাকারে ঘুরে আসে জলের মিছিল
অন্ধকার ফিরে আসে
জোছনারা মুছে যায়
কেঁদে ওঠে শোকাক্ত হৃদয়
কোথায় যাচ্ছে মানুষ, কোথায়?

বয়স নিঃশেষ হলে চঞ্চল হয় মাটির জিহবা
উদ্ভ্রান্ত নিঃশ্বাসে টেনে নেয় স্তম্ভ কাফন
লেপের ভেতর টেনে নেয় রাত গহীন কবর
কোথায় যাচ্ছে মানুষ, কোথায়?

অন্ধকার গাঢ় হলে
কাফন জড়িয়ে বসে থাকে নবাগত লাশ
কবর হাঁক দেয়ঃ
আর কত জেগে থাকে, এবার ঘুমাও।

লাশের বিদ্রোহে সরব হয় গহীন কবর
শৈত্য প্রবাহে জেগে ওঠে লাশের কোরাসঃ

না, ঘুমাবো না আমি
নিঃসঙ্গ বৃকে আমার পাথর চাপা দীর্ঘশ্বাস।
সবাই ঘুমিয়ে যাক
আমি তবু জেগে রবো পৃথিবীর সমান্তিকাল
জেগে থেকে দেখে যাবো অনন্ত প্রহরঃ

কোথায় যাচ্ছে মানুষ, কোথায়?

মধ্য যৌবনের কবিতা

যৌবনের কি কাল থাকে? বয়স থাকে? সময় থাকে? যৌবন কোথায় থাকে? কোথায় থাকে না? কবরের নিচে পাঁচটি পাঁজর ছুঁয়ে দশটি কংকাল কথোপকথন করে। প্রত্যেক কবরের দূরত্ব তিন ফুট ছয় ইঞ্চি। কবরের পচা খুঁটি ধরে বিশজন আলেম জ্বীন এবং পচিশজন বিজ্ঞ ফেরেশতা শোনেন দশটি কংকালের সঘন আলাপচারণ।

যৌবন কোথায় থাকে? হৃদয় কোথায় থাকে? ফেরেশতার পকেট থেকে লাফিয়ে পড়ে জিজ্ঞাসার শেষ সংকেত। সংকেতের গভীরে, পাঁচশো ফুট গভীরে, তাঁর চেয়েও গভীরে, পৃথিবীরও অতীত, পৃথিবী সমাপ্তিরও পরে— দীর্ঘকাল, কালেরও অসীম যৌবনের বয়স!

আসলেই কি যৌবনের বয়স আছে? হৃদয়ের? মানুষের? কালের? মহাকালের? প্রতিটি আত্মার ভেতর দিয়ে কি যৌবন হাটতে পারে? প্রতিটি যৌবনের ভেতর কি আত্মা বসবাস করতে পারে? সমুদ্রের তলদেশে? জেট বিমানের ধোঁয়ার ভেতর? অনুর শরীরে?

সম্ভবত যৌবনই পারে। অন্ধকার পারে না। কেননা সূর্য ওঠার মুহূর্তেই তার বয়স ফুরিয়ে যায়। নিঃশেষ হয়ে যায়।

রাত গভীর হলে অন্ধকার বিদীর্ণ করে প্রাচীন গোরস্তান থেকে হঠাৎ যে আওয়াজ শোনা যায়— সে কার চিৎকার? কোন্ দরবেশ? কার যৌবন? তাহলে কি যৌবন মরে না কখনো? হাজার বছর? লক্ষ বছর? সহস্র কোটি বছর? তাহলে কি বেঁচে থাকে আত্মা? হৃদয় —অনন্তকাল?

কদম চেহারার— আসলে তার কোন চেহারা নেই। ছায়াও নেই। কেবল তাকে অনুভব করা যায় ঘুমের ভেতর। স্বপ্নের ভেতর। নিঃসীম অন্ধকারে চোখ বন্ধ করে প্রচণ্ড ঝড়ের সাঁ-সাঁ শব্দের ভেতর। এমনই একজন সোবহে সাদেকের পূর্ব মুহূর্তে অদৃশ্য সিঁড়ি বেয়ে নেমে এলেন পৃথিবীতে। হাটতে হাটতে তিনি আকাশচুম্বি দু'টি বাছ নেড়ে এই উপকূল বাসীকে, এই মহাদেশ বাসীকে একবার— মাত্র একবার যৌবনের পাঠ শেখাতে গিয়ে চিৎকার করে বলেছিলেনঃ না, যৌবনের কোন বয়স নেই।

জানি তার সে চিৎকরে দুলে ওঠে আগুনের পেতুলাম।
প্রতিটি গ্রহ এবং নক্ষত্র থেকে ঝরে বজ্রের প্রস্রবণ। তার সে চিৎকারে

আকাশ দু'ভাগ হয়ে মাঝখানে দাঁড় করান যৌবনের ফুলকি এবং অভিজ্ঞ
ফেরেশতারা মানুষের হৃৎপিণ্ড নিয়ে পুনরায় গবেষণায় মগ্ন হন। তবু
মানুষ- মানুষ কেমন বেখেয়াল- জিহবার মধ্যভাগে তার যৌবন লুকিয়ে
মোজ্জার তেতর বয়স রেখে এবং হ্যান্সারে হৃদয় টাঙ্গিয়ে ককিয়ে
ওঠে সদ্য ভূমিষ্ঠ শিশুর মতোঃ হৃদয়, হৃদয়-যৌবন কোথায় থাকে?

বীজের জীবন

মৃত্যু ছাড়া পূর্ণ নয় বীজের জীবন

বৃক্ষ থেকে ঝরে পড়ে বয়স্ক শরীর
মৃত্তিকায় সমর্পিত

তারপর শুষে নিলে জীবনের ঘাম
তখনো কি বেঁচে থাকে অলীক হৃদয়

শুক ফল থেকে অসংখ্য প্রাণের উদ্গম
এভাবে জীবন থেকে আশ্চর্য মৃত্যুর দিকে
ক্রমাগত ঝরে ঝরে পড়া
আসা আর যাওয়া

মৃত্যু ছাড়া পূর্ণ নয় বীজের জীবন
বীজ তো মূলত মানুষ- শস্যের সুতীব্র শীষ

হঠাৎ মধ্যরাতে

মধ্য রাতে হৃদয়ের ভেতর ক্রীম কালার টেলিফোন
ফোনের তারের ভেতর দিয়ে হেঁটে চলে উৎকর্ণ ফড়িং
ডায়ালের ভেতর ক্রমাগত ক্রিং ক্রিং
নম্বরহীন টেলিফোন কেবলই জীবন

ক্যালেন্ডারের পৃষ্ঠা নেমে আসে দেয়াল থেকে
পায়চারী করে আরশোলার সাথে
ঘুরতে ঘুরতে হারিয়ে যায় ক্যালেন্ডারের তারিখ
হারিয়ে যায় বাইকালার ছাপা দিন ও সাল
ক্যালেন্ডার হাত রাখে ফোনের ওপর
ক্রিং ক্রিং নম্বরহীন টেলিফোন কেবলই জীবন

তারের ভেতর দিয়ে নম্বরহীন ক্যালেন্ডার যায়
ক্যালেন্ডারের মতো জীবন যায়
স্বজন হারা অতৃপ্ত কংকালের চিৎকার যায়
কেবলই যায়, ক্রিং ক্রিং জীবন যায়

মধ্য রাতে হৃদয়ের ভেতর ক্রিম কালার টেলিফোন
ফোনের তারের ভেতর ক্যালেন্ডার
ক্যালেন্ডারের পৃষ্ঠা ঝরে ঝরে পড়ে
আরশোলা খুঁটে খায় দিন তারিখ সাল
উৎকর্ণ ফড়িং জানালার শার্শি ধরে চন্দ্র ডোবা দেখেঃ
আহা, পৃথিবীর ঘুম ভাঙ্গাবার জন্যে আজ আর কোন
প্রজাপতি নেই

হৃদয়ের ভেতর নম্বরহীন ক্রীম কালার টেলিফোন
ক্রিং ক্রিং
ভুল করে তবুও যেন কার হৃদয়ে
একটি ডায়াল টোন বাজে হঠাৎ মধ্যরাতে

পৃথিবীর ভবিষ্যত

একদিন এ পৃথিবী বড় একা হয়ে যাবে
নিঃসঙ্গ পৃথিবী তখনো কি জেগে রবে অমরতা বৃকে

গাঢ় অন্ধকারে দুলে ওঠে কান্নারত শতায়ুর দেহ

একদিন এ পৃথিবী বড় একা হয়ে যাবে
বাতাস মথিত করে ভেসে ওঠে নক্ষত্রের শিরা
নিভে যায় সস্তাপে জ্বলন্ত লাভা
একা হয়ে গেলে সোমন্ত পৃথিবী
কোথায় লুকোবে মুখ জোছনার হরিণ

কঠিন পাথর ফেটে উঠে আসে তরঙ্গিত ফেনা
ঝুলে থাকে শার্শিতে সূর্যের সুদীর্ঘ জিহবা
বিষণের মোড়ক থেকে ছিটকে পড়ে ভাগ্যাহত শিশুঃ

একা হয়ে গেলে ভয়ার্ত পৃথিবী আশ্রয় নেবে কি আর্চর্য শামুকের পেটে
কিংবা অদৃশ্য ছায়াপথ হেঁটে হেঁটে
নিঃশেষিত হবে কি যৌবনের বাড়ন্ত বয়স

একদিন এ পৃথিবী বড় একা হয়ে যাবে, ভীষণ একা

যাতায়াত

প্রতিটি মানুষ আজ গন্তব্যহীন
স্বপ্নের চোরাবালিতে নিমজ্জমান

দ্রুত তলিয়ে যাবার মুহূর্তে
কঠিন ধমকে ভেঙ্গে যায়
পৃথিবীর স্বপ্নাতুর কীচের চিমনি
চিমনির প্রগাঢ় ধোয়ার ক্যানভাসে
এখন প্রতিটি মানুষের মুখাবয়ব
মোহাম্ব পৃথিবীর মতো ঝাপসা- আঁধার

আরও প্রগাঢ় হলে আঁধারের চোখ
আরো নিবিড় হলে আঁধারের ছায়া
দরজায় অকস্মাৎ কড়া নড়লে
হঠাৎ নেমে এলে দস্যুর দল
যেভাবে আতঙ্কিত হয় বণিক বহর
ঠিক তেমনি জ্বীনের বাদশার মতো
শঙ্ক করাঘাতের আওয়াজ শুনে
কে, কে: বলে দরজায় হাত রাখতেই
শব্দ ভেসে এলো: মানুষ, মানুষ

ভাবছি প্রতিটি মানুষই আজ গন্তব্যহীন
তবে এইমাত্র যার আওয়াজ শুনলাম- সে কে
এতো গাঢ় অন্ধকারে নিজেই ছায়াও কেমন অস্পষ্ট
তবুও চলমান রূপপিণ্ডে হাত রেখে বুঝলাম:
জ্বীনের বাদশা নয়:

যার আওয়াজ শুনেছি সে আমি
আমার আওয়াজই পদার্থের সকল স্তর ভেদ করে
দ্রুত গতিতে রহস্যের দ্বার উন্মোচনে সক্ষম
বুঝলাম- প্রকৃত অর্থে মানুষ ও তার শব্দপুঞ্জ
এখনো গন্তব্যহীন নয়

সূতরাং আমি আমার গন্তব্য সম্পর্কে নিশ্চিত জেনে
আপাতঃত অনুজ্জ্বল স্বপ্নহীন- স্বপ্নের ভেতর নিমজ্জিত হলাম

দহন

ভস্ম হোক তামাটে সময় দুর্বিসহ মহাকাল
ভস্ম হোক নিবীৰ্য প্রহর যন্ত্রণার কালনাগ।

কষ্টের কেশর থেকে ঝরে পড়ে আয়ুশ্বতী বৃষ্টি।
বৃষ্টি দীর্ঘতর হোক। পাষাণে পাষাণ ঘষে যদি
জ্বলে ওঠে আরণ্যক শিশু- তবে হয়তো সেদিন
অরণীর দাহ ভস্মে বেঁচে যাবে ক্ষয়িষ্ণু পৃথিবী।

বৃক্ষ তুমি পুড়ে পুড়ে ভস্ম হও। ভস্মের শরীর-
বাতাস দু'ভাগ করে দুর্দিনের বাজু ধরে হট্টো।
হতাশনে পুড়ে যাক দেহ মন গ্লানির বাকল।
কত আর ভস্ম হবে, কতটুকু জঠরে আগুন?

বৃক্ষ তুমি পুড়ে যাও; তারপর কঠিন পাথর।
পাথরে পাথর ঘষে তারপর জ্বালাও আগুন।
জীবন তো মুহূর্তের জ্বালাময়ী বীর্যের প্রতিম
মূর্ত্যুই সত্য কেবল, অনিঃশেষ কালের প্রতীক।।

মানুষ নক্ষত্র এবং গাঙচিল

রাত আরো গভীর হলে পৃথিবী নেমে আসে সংগোপনে।
জলসা ঘরে। কেবল তখনও একটি ঘর অন্ধকার।
নিঃসঙ্গ। কোন একদিন গ্রীবা নেড়ে ডেকেছিল সমুদ্র।
সে কি প্রেম নাকি ঘৃণা? তার হৃদয়ে এখন কার বসবাস?
কার যাতায়াত?

বহুদিন হলো গাঙচিল সমুদ্র তীর ছেড়ে
চলে গেছে নিরুদ্দেশে। বাচ্চার খোঁজে। মানুষ তো নিজেই
তার সন্তান হস্তারক। গাঙচিলের খবর আর কে রাখে?
কিন্তু নক্ষত্রেরা রাখে। তারা নেমে আসে আসমান থেকে।
গভীর মমতায়। সমুদ্র তীরে। গাঙচিলের খোঁজে তারা
এখনো সারাটি মণ্ডসুম কাটায় নির্ভুম, চরে চরে, বনঝোপে।

মানুষের প্রতি সম্ভবত আর কারুন্নই সমবেদনা
নেই। মমত্ব নেই। গাঙচিলের খোঁজে নক্ষত্রেরা দরজায় টোকা
দেয়। মানুষের গন্ধ পেয়ে দ্রুত হারিয়ে যায়। ছড়িয়ে পড়ে
তাদের ঘৃণার পালক। আশ্চর্য! তবু তারা ভালো বাসতে
জানো। কিছু মমত্ব তাহলে ছিল নক্ষত্রের চোখে।

মমত্বের কথা কাল সকালে কোন মানুষ আর
ভাববে না। শুধু জানবে— গাঙচিল কিংবা নক্ষত্র— মানুষের
চেয়ে অনেক বেশী সংবেদনশীল। মানুষেরা দেখবে— আরও
তীর্থক তীক্ষ্ণ ভালোবাসা নিয়ে মৃত্তিকা, বন এবং প্রকৃতিগত
সৌন্দর্য নিয়ে একটি উজ্জ্বল ভবিষ্যতের দিকে এ পৃথিবী কেবল
ধাবমান—মানুষের জন্যে নয়; সমুদ্র নক্ষত্র বন এবং গাঙচিলের
জন্যে সে অপেক্ষায় প্রহর গুনছে।।

ফেরেশতারা

দীর্ঘ বিরতির পর। সমুদ্রপাড় থেকে উঠে আসার সময় একবার তিনি উর্ধ্বে তাকালেন। রাত তিনটে বত্রিশ মিনিট। সমুদ্রের জলরাশি পূর্ণ জোছনার সাথে মিলে মিশে রূপোলী মুদ্রা। পশ্চিম আকাশের দিকে দু'হাত তুলে তিনি অপেক্ষমান ফেরেশতার সাথে সালাম বিনিময় করলেন। তারপর আশ্চর্য সফেদ হাত বাড়িয়ে পরস্পর মোলাকাত করলেন।

লোকটি কুশলাদি বিনিময়ের পরিবর্তে ফেরেশতার ধবধবে আলখেল্লার দিকে তাকিয়ে বললেনঃ আল হামদুলিল্লাহ। নিচ্চয়ই মহান প্রভু মানবজাতিকে উচ্চ- পৃথক সন্মানে অধিষ্ঠিত করেছেন। ফেরেশতারা, আমাকে নয়; সমগ্র মানব জাতিকেই সন্মান দেখানো উচিত। ফেরেশতারা আর একবার মানবজাতির উদ্দেশ্যে উচ্চ কণ্ঠে সালাম বললেন।

লোকটি এবার দু'হাত তুলে বললেনঃ হে আশরাফুল মাখলুকাতের মালিক, মানুষের ওপর থেকে তুলে নাও তাবৎ অভিযোগ।

বুলন্ত রেশমী আচকান দিয়ে মুখের ঘাম মুছতে মুছতে ফেরেশতারা লোকটির পরিচয় জানতে চান। তিনি সমুদ্রের রূপোলী জলরাশির দিকে রহস্যময়ী দৃষ্টিতে তাকালেন। তারপর আকাশের দিকে। লোকটির চাহনীতে সমুদ্র এবৎ তার জলরাশি হাটতে হাটতে বিশাল ঈদগাহে জমায়েত হন। আসমান থেকে বিছানো গাঢ় সবুজ রঙের গেলাফে আবৃত সেই এক আশ্চর্য ভাসমান ময়দান।

লোকটি মেহরাব থেকে সুউচ্চ কণ্ঠে পাঠ করলেন ঐশীবাণী। তাঁর সে আওয়াজ পৃথিবীর দুর্ভেদ্য প্রাচীর ভেদ করে ঢুকে গেল অলিন্দে অলিন্দে। ফেরেশতারা একমাত্র মগ্ন শোভা।

ঠিক এ সময়ে একটা প্রচল্ড লু হাওয়ায় সমস্ত ময়দান কোঁপে কোঁপে উঠলো। গেলাফ ফাঁক হয়ে গেলে ফেরেশতারা আতংকিত হলেন। কেবল মানুষ- মানুষই পদার্থের স্তর ব্যুহ ভেদ করে মাথা উঁচু করে সোৎসাহে চিৎকার দিয়ে বলে উঠলেনঃ

বস্তুত যুদ্ধ মানে রক্ত। আর রক্তই একমাত্র ফয়সালা।

লোকটি মোনাজাতের মধ্যে কাঁদো স্বরে বললেনঃ হে আশরাফুল মাখলুকাতের মালিক! আমাদের বাহতে শক্তি দাও। আমাদেরকে শংখলমুক্ত করো। তার প্রার্থনার ঝড়ে সমুদ্র দ্বিগুণ হলো। আকাশ বিশাল হলো। আর পৃথিবীর মানচিত্র উড়তে উড়তে অসীমের পাদদেশে লুটিয়ে পড়লো। যেখান থেকে দেখা যায় আর এক বিশ্ব। আর এক বিশাল মানচিত্র। সম্মানিত ফেরেশতারা চোখের জল ছেড়ে ডুকরে কেঁদে উঠে বললেনঃ আমীন, আমীন।

প্রার্থনা শেষ হলে একটি রহস্যময়ী রাতের আচ্ছাদনে ঢাকা পড়ে গেলেন তিনি এবং পৃথিবী বিচরণকারী আগন্তুক মানুষের কল্যাণকামী সেইসব ফেরেশতারা।।

জীবন ও বৃক্ষ

গ্লাসে অনেক বেদনা
গ্লাসটি উপুড় করে দিন

বাতাসের পর্দা ফাঁক করে ওপরে উঠুন
আর একটু ওপরে
অদৃশ্য গোলকে দন্ডায়মান এক আশ্চর্য বৃক্ষ
বৃক্ষের শেকড়-বাকলে অজস্র স্বপ্ন
বৃক্ষের প্রতিটি পাতা- সজীব জীবন

বৃক্ষটিকে নাড়া দিন
মানুষেরা স্বপ্ন পাবে
বৃক্ষকে স্পর্শ করুন
মানুষেরা অনন্ত যৌবন পাবে

জীবনেরা বড় ক্লাস্ত কৌচের বোতলে
বোতল ভেঙ্গে ফেলুন

গ্লাসে অনেক বেদনা
গ্লাসটি উপুড় করে দিন
বৃক্ষকে স্পর্শ করুন

স্বপ্নের পারদ থেকে মানুষ জেগে উঠুক
জেগে উঠুক জীবন বৃক্ষ এবং অনন্ত যৌবন

অনন্তের ছায়াপথ

মৃত্যুর পর কোথায় যায় আত্মারা
মৃত্যুরা খামছে ধরে স্বপ্নের জিন
তারপর কেশর দুলিয়ে উঠোন পেরিয়ে
অরণ্য পেরিয়ে সমুদ্র পেরিয়ে হেটে চলে
প্রতিদিন কোথায় যায় আত্মারা
জনপদে সওয়ার হলে মৃত্যুরা
ভেড়ার পশম থেকে ঝরে পড়ে ভয়ের বৃষ্টি
তারপর খেলা কেবল
তারপর হাটা চলা
তারপর ঘুম ঘুম
আত্মারা ঝুলে থাকে অদৃশ্য বৃক্ষে
মৃত্যুরা জিভ ঘষে তারপর বাকল কাটে
বৃক্ষ কাটে তারপর আত্মা
আত্মা নিয়ে প্রতিদিন সে কি উল্লাস মৃত্যুর বাড়ি
সারাটি প্রহর
আত্মার উঠোনে মৃত্যুর পায়চারী
তারপর অশ্ব সওয়ার
তারপর গভীর রাতে হাঁক দেয় মৃত্যু প্রহরী
তারপর যেতে যেতে খুঁটে খায় আত্মার ফল
তারপর কোথায় যায় আত্মারা
কোথায় যায় মৃত্যুরা
সব শেষে কোথায় যাবে আত্মারা
কোথায় যাবে মৃত্যুরা
রাখাল বালক বোঝে না কিছুই

অলীক কংকাল

প্রতিটি আবাস যেন একেকটি অমাবস্যা গোর
গোরের তেতর থেকে বেরিয়ে আসেন মহান কংকাল
কংকাল থেকে অসংখ্য ক্রীড়াবিদ অজগর

ঝিনুক ফেটে ছিটকে পড়ে বিশ্বয়কর পুরুষ
তীর্যক বারুদে জ্বলে ওঠে গোপন আগ্নেয়গিরি

অবাক ঝরনা দিয়ে ঝরে পড়ে তেজদীপ্ত ধারা
অদৃশ্য বোগল থেকে খসে পড়ে নাস্ত্রিক উল্লা
সাহসের জিল ধরে ছুটে চলে দুর্দান্ত যৌবন

দুঃস্বপ্নের মধ্য দিয়ে
প্রতিটি আবাস ছুঁয়ে হেঁটে যান অলীক কংকাল

প্রাচীন শ্যাওলার মস্তক

তোমাকে লিখতে না পারার লজ্জা আমাকে আর পীড়া দেয় না।
ক্ষমা চাওয়ার প্রশ্নই অবাস্তব। কেননা জেনেছি, পুরুষের
যৌবন হিমালয় পর্বতকে পকেটে রেখে ভাটিয়ালির সুর
টেনে হেঁটে হেঁটে সমুদ্র পাড়ি দেয়। অশ্ববেগ যৌবনের
কাছে বিনম্র জোছনা কোনদিন প্রার্থিত হতে পারে না।

আমি জানি, একদিন যেখানে ছিল আমাদের
বসত ভিটে এবং দুখাল গাভীর যেখানে ছিল চারণ ভূমি
সেখানে আজ অস্ত্রের কারখানা। শত্রুদের ঘাঁটি। আর
কবরস্থানে বসেছে তাদের জলসা-বাজার।

সময় তো এমনই। তুমারাবর্তে ঢেকেছে নিয়ম। প্রকৃতির
চোখে মাকড়সার জাল। পাখির নীড়ে সরিসৃপের বাস।
দিনে দশবার পৃথিবী ধাবিত হয় আত্ম হননের দিকে।

একটি নিয়তির সাঁকোর মাঝামাঝি দাড়িয়ে মহাকাল।
আমি অদূরেই। সাঁকোর নিচে কাঁদাজলে মাঝামাঝি করে
বেঁচে আছে প্রাচীন শ্যাওলার দল। কে বলেছে শ্যাওলার প্রাণ
নেই? বহু যুগ আগে বাস্তুহারা অসহায় মানুষেরা- তাদের
আত্মাগুলো ঐ শ্যাওলার মস্তকের ভেতর গচ্ছিত রেখে যাযাবরের
মতো পালিয়ে বেড়াচ্ছে। আহা অশান্ত, অতৃপ্ত আত্মা।

ভরাট অন্ধকার ফেটে চকচক করে ওঠে মৎস্য শিকারীর
হাতের কোচ। শ্যাওলার আর্তনাদে জ্বীন এবং পস্তরা সন্ত্রস্ত। কেবল
মানুষই শুনতে পায় না সে আওয়াজ। বৃক্ষরা শুনতে পায়। তারা
জানে, শ্যাওলার মস্তকের ভেতর রক্ষিত আত্মাগুলোই আগামী কালের
বিদ্রোহ। পৃথিবীর অন্তিম ফুলিঙ্গ।

ভাবছো, মৎস্য শিকারীর কোচে বিদ্ধ হবে আত্মাগুলি।
ভাবছো, বেদখল হয়ে যাবে ভিটে, কবরস্থান এবং গোচারণ ভূমি।
ভাবছো, এই অন্ধকার, এই সুউচ্চ পর্বত শৃঙ্গ এবং ঐ মৎস্য শিকারীই
পৃথিবীর সর্বশেষ প্রজন্ম! অনিবার্য নিয়তি।

কিন্তু, না। অন্ধকার বিদীর্ণ করার সাহস আমার আছে।
তুমি কেবল অপেক্ষায় থেকো।।

ইতিহাসের বাড়ি

ঐ বাড়িটা অনেক প্রাচীন
ঐ বাড়িটা দাড়িয়ে একা, ভীষণ একা
ঐ বাড়িটা পাঁচশো আধার

ঐ বাড়িটা অনেক প্রাচীন প্রাচীন কুঁচ
কুঁচের ভেতর প্রাচীন মানুষ
ঐ বাড়িটা অনেক প্রাচীন
আরো প্রাচীন হাড়ি পাভিল
কাঠের খড়ম প্রাচীন পেরেক

ঐ বাড়িটা অনেক প্রাচীন
ঐ বাড়িটা লাটাই ঘুড়ি শূন্য বাতাস
ঐ বাড়িটা সন্ধ্যা সন্ধ্যা
ঐ বাড়িটা অনেক প্রাচীন
ডাবের ভেতর পাঁচটি ছায়া দুইটি ঘুড়ি
ঐ বাড়িটা বয়স ছাড়া স্বপ্ন ভাসা রঙিন চুড়ি

দুর্বিনীত হরিণের শিং

পায়ের কাছেই হাঁটু ভেঙে বসে আছে ঝড়
মাথার শিথানে দাউ দাউ জ্বলন্ত আগুন
ভেটিলিটারে ঝুলন্ত মানুষের গলিত শরীর
এসব নির্মম খবর শুনেও এক আশ্চর্য পারদে
জ্বলতে থাকে নির্মোহ সময়ের বৃদ্ধ অর্বাচীন

হাতের তালুতে সুস্পষ্ট ভাঙনের রেখা
মৌসুম ফুরালে শেষ মানবিক দ্যুতি
এমন দুঃস্বপ্নে দীর্ঘতর হলে রাত
সূর্য ম্লান হেসে দূরে চলে যায়
সমুদ্র পেছনে হাঁটে
বসন্ত ফিরে যায়

কেবল তখনো জেগে থাকে কোনো এক ক্রোধের খিঙ্কারঃ
চারদিক দুর্বিসহ কি এক ক্ষতের চিহ্ন
তবু বাতাসের বিরুদ্ধে দাঁড়িয়ে রয়েছে
শাল বৃক্ষের মতো বিশাল
দুর্বিনীত হরিণের শিং

খসড়ার প্রতিবিম্ব

নক্ষত্রপুঞ্জ পেরিয়ে মেঘালয় থেকে দমকা বাতাসে ছিটকে পড়া
বৃক্ষের কাণ্ডের মতো তোমার আওয়াজ এখন দৃশ্যমান বজ্রের প্রস্রবণ।

মৌসুমের হাতে এখন অসমাপ্ত কবিতার খসড়া। খসড়ার পাতলুনে
প্রতিবাদের ভোনা খিচুড়ি। কবিতার শরীরে যুদ্ধের মেশকী সুবাস।
টগবগিয়ে বলক তুলছে সমরাত্তরের উপমা। পাতিলে অর্ধসিদ্ধ
তৃতীয় বিশ্বযুদ্ধের সুস্বাদু ছালুন।
পাশে দভায়মান অসহায় বিমর্ষ রাত। পিপাসার পানি। বাসি খাবারের
বিকট গন্ধ। এ সবই আজ অস্পৃশ্য। গ্রাহ্যের অতীত।
এমন কি বামপাশে শায়িতা হালাল শরীর।

দুর্বিনীত সময়ের শিঙে ঝুলে আছে অনাগত ভবিষ্যত। সরবিদ্ধ স্বপ্নের হরিণ।
তীব্র বাতাসের গন্ধ নিয়ে উড়ে যাচ্ছে আর্চর্ষ হরিয়াল। উড়ে যাচ্ছে
ফসলের ক্ষেত। খাদ্যের গুদাম। কারখানার ভোজ্য পণ্য। দিনান্তের আহার।
কবিতা শুদ্ধ হলে সময় দ্বিখণ্ডিত হবে।
কবিতা থেকে জন্ম নেবে অলৌকিক বৃক্ষ। বৃক্ষের প্রতিটি শাখায়
বিকশিত হবে যৌবনের সবুজ পল্লব। বৃক্ষকে স্পর্শ করলেই টুপটাপ
ঝরে পড়বে তেজদীপ্ত সাহস।
কবিতা শুদ্ধ হলে সময় দ্বিখণ্ডিত হবে।

তারপর বহমান সমুদ্র। জাফরানী মহাকাল। গগনবিদারী সোনালী
গন্ধুজ। উন্মুক্ত হাওয়া। প্রভাতের সীমানাহীন আলোক প্রসূন।
বৃষ্টির পেখম বেয়ে ঝরে যাচ্ছে দুঃসংবাদ। মড়ক মহামারী। ধ্বংসের
সূত্রের চিৎকার। ঝড়ের আফ্রালনে কাত হয়ে পড়ে আছে সময়ের শালবৃক্ষ।

ভেঙ্গে গেছে সূর্যের ডান বাহ এবং জোছনার বেড়ে ওঠা কাণ্ড। চলমান
মেঘের আড়ালে বিরুদ্ধ শিবির। অশ্বের হ্রেষা ধ্বনিতে পর্বত প্রকম্পিত।
লু হাওয়ায় পাক খেয়ে ওপরে উঠে যাচ্ছে ঈর্ষার আগুন।
তবুও গ্রহের তীব্রবেতে জ্যোতির্ময়ী রুৎপিণ্ড। পবিত্র পৃষ্ঠার ভেতর অসম্ভব
অমিত তেজ। বাতাসের বিরুদ্ধে অগ্নি প্রবাহ। তরঙ্গিত সমুদ্র লেজ
নেড়ে অলৌকিক শব্দপুঞ্জকে স্বাগত জানাচ্ছেঃ

কবিতা শুদ্ধ হলে সময় দ্বিখণ্ডিত হবে। তারপর প্ৰভাতের সীমানাহীন আলোক প্ৰসূন।

তোমার আওয়াজ এখন নিদ্রাহীন রাতের বৃকে শব্দহীন ছায়ার প্ৰতীক।
তোমার আওয়াজ এখন শূন্য চায়ের কাঁপে নিস্তরঙ্গ অসীম শূন্যতা।
কেবল ষিক্কাৰ ও গ্ৰানির আস্তরণ ফাঁক করে ভেসে যাচ্ছে
সমুদ্রগামী সৌখিন পাখিঃ

মৌসুমের হাতে এখন অসমাপ্ত কবিতার খসড়া। খসড়ার বৰ্ণগুলো
উত্তর প্ৰজন্ম। অলৌকিক যৌবন। মহাকাল- কালজয়ী শালবৃক্ষ।
প্ৰতিপক্ষে বিরুদ্ধ শিবির। ঈৰ্বার আশুন। অসমাপ্ত খসড়া ফেলে
এখন তো যাওয়া চলে না।

কবিতা শুদ্ধ হলে সময় দ্বিখণ্ডিত হবে।

সুতরাং তোমার আওয়াজ আরও দীৰ্ঘতর হোক। আরও কিছুটা প্ৰলম্বিত

মহা শূন্যের বারান্দা

সেই এক অদৃশ্য সিঁড়ি বেয়ে হাজার কিলো পথ নিচে নেমে গেছি
সেখানে ঝুলন্ত এক সাকো
তার নিচে নদী নেই সমুদ্র নেই স্থল নেই পাহাড় নেই
তার ওপরে কোন ছাদ নেই আকাশ নেই মেঘ নেই রোদ নেই
সিঁড়ির দু'পাশে কোন অরণ্য নেই মহাদেশ নেই
তবুও কেউ যেন ডেকেছিল
কার আওয়াজে যেন সিঁড়ি হয়েছিল
সেই সিঁড়ি বেয়ে নেমে গেছি
এখন পায়ের নিচে সিঁড়িও নেই
মহা শূন্যের বারান্দায় প্রাতঃভ্রমণের মতো পায়চারি করছি
হে অদৃশ্য আওয়াজের মালিক
ভূমি যেই হও না কেন
হও না কেন কোন অশরীরি, অস্তিত্বহীন
জিঘাৎসার পর্বত শৃঙ্গ নড়ে ওঠার আগেই তাবৎ আচ্ছাদন ফেড়ে
আমি তোমাকে আবিষ্কার করবো এবং
তোমার জিহবার অগ্রভাগ কেড়ে নেবো
সমস্ত নৈঃশব্দ চিরে যেখানে কেবল উচ্চারিত হবে
আমার নামঃ
মানুষ

এই সমতট সমুদ্র বিলাস

এই সমতট সমুদ্র বিলাস একদিন ছিল মানুষের হাতে
মানুষের ভবিষ্যৎ ছিল- উপকূল নদী গভীর অরণ্য
মানুষের স্বপ্ন ছিল- পাথর বরফ ফুঁড়ে বৃক্ষ রোপণ

এখন মানুষ অর্থ- অনড় পাথর
পাথর ফেটে ছিটকে পড়া আতীর তুষার

এখন আয়না অর্থ- বিকৃত চেহারা
এখন পকেট অর্থ- অসম্ভব অন্ধকার
এখন জীবন অর্থ- পুঞ্জিভূত দীর্ঘশ্বাস

মানুষের হাতে উঠে এলে সমুদ্র বিলাস
জলের তরঙ্গ হবে অমর সঙ্গীত

এখন মানুষ অর্থ- অনড় পাথর
পাথর ফেটে ছিটকে পড়া আতীর তুষার
এখন মানুষ অর্থ- ভাস্কি এসরাজ

একদিন মানুষের স্বপ্ন ছিল পাথর বরফ ফুঁড়ে বৃক্ষ রোপণ
একদিন মানুষের হাতে ছিল এই সমতট সমুদ্র বিলাস

এখন মানুষ অর্থ- দীর্ঘশ্বাস, অসম্ভব অন্ধকার

ঘুমিয়ে পড়েছে রাত

ঘুমিয়ে পড়েছে রাত

কেঁদো না যৌবন

পৃথিবীর অমঙ্গল হবে

কাছিমের পেটে বিপন্ন মানুষ

পাতিলে উষ্ণ দীর্ঘশ্বাস

চামচ থেকে ছলকে পড়ে সজীব রক্ত

তবুও মেঝেতে

ঘুমিয়ে পড়েছে

ঘুমিয়ে পড়েছে রাত

কেঁদো না যৌবন

পৃথিবীর অমঙ্গল হবে

স্বপ্নের সড়কে

এই সড়কগুলো একে বেকে নেমে গেছে বঙ্গোপসাগরে

এই সড়কগুলো কল্লোলিত ঝরনার গান প্রপিতার কাঠের খড়ম
গড়গড়ায় স্বাদুতামাকের মৌ মৌ ধোঁয়ার কুন্ডলী
নববধুর রঙিন পালকি ভাটিয়ালী সুরের মুর্ছনা
ঢেউ ভেঙ্গে ছুটে চলা কাঠ বোঝাই গুণটানা গহনা নৌকা
এই সড়কগুলো লাটাই ঘুড়ি ঝামাঝাম বৃষ্টি বসন্তের মাতাল হাওয়া

এই সড়কগুলো জ্যোতদার মহাজন বৃটিশ বেনিয়া চাবুকের কষাঘাত
এই সড়কগুলো মৃত্যু ব্যাধি ক্ষুধার দানব ক্রীতদাসের দগদগে ক্ষত

এই সড়কগুলো ঈসা খাঁ বখতিয়ার শরিয়াতুল্লাহর বাঁশের কেতলা
এই সড়কগুলো শায়েরস্তা খাঁ নবাব সিরাজুদ্দৌল
অশ্বের খুরধ্বনি কামান গোলা ধনুকের টংকার
এই সড়কগুলো একে বেকে নেমে গেছে বঙ্গোপসাগরে

এই সড়কগুলো বঙ্গোপসাগর সাগরের তুফান
তুফান ভেঙ্গে ছুটে চলা দুরন্ত হাঙ্গর
হাতীর দাঁতের তীক্ষ্ণ শাণিত তলোয়ার
গভীর অরণ্য থেকে ঝাঁপিয়ে পড়া আদিম সাহস
এই সড়কগুলো রক্ত ঘাম দাঙ্গা যুদ্ধ দ্রোহের আশুন
এই সড়কগুলো নির্ভীক চিরকাল রোদনহীন—
দেশ মহাদেশ কাল মহাকাল অগ্নিপুরুষ

এই সড়কগুলো পাথর আশুন তাম্বলিপি কঠিন শৃঙ্গ
এই সড়কগুলো শহীদ গাজী মানুষ মৃত্তিকা অসম্ভব যৌবন
এই সড়কগুলো যুদ্ধাক্রান্ত তবুও বারবার অজেয় পর্বত

এই সড়কগুলো নদী সমুদ্র ঝরনার কল্লোলিত স্বপ্নের সঙ্গীত
এই সড়কগুলো একে বেকে নেমে গেছে বঙ্গোপসাগরে

বিস্তৃত প্রতিভাস

মানুষের চোখ থেকে উড়ে আসা ভাসমান ভালোবাসা
সে এক প্রাচীনতম দীর্ঘ ইতিহাস
সামুদ্রিক ক্যানভাসে আঁকা প্রকৃতির অমর পোর্ট্রেট
মানচিত্রের কারুকাজ
মানুষ অর্থ- বাদামী তিল থেকে ছিটকে পড়া
অসম্ভব সস্বোহনী আহবান

শাদা পৃষ্ঠা অর্থ- মানুষের উজ্জ্বল হৃদয়
হৃদয়ের অসংখ্য কবুতর, শাদা পালকের ছড়াছড়ি
পালকের ভেতর তোমার উপমা, চিত্র কল্পের মহান দ্যুতি
শাদা পৃষ্ঠা অর্থ- আতীর স্বপ্নের প্রতীক

স্বপ্নের ভেতর তুমি আছো
তুমি অর্থ- মানুষের কার্বন পেপার
তুমি অর্থ- ফটোস্ট্যাট মেশিন, টাইপ রাইটার
তুমি রূপান্তরিত হচ্ছে মানুষের ভেতর, মানুষ মানচিত্রে
মানচিত্র মহাবিশ্বের একক প্রতিকৃতি

শাদা পৃষ্ঠা অর্থ- তুমি, অসংখ্য ভাসমান আত্মা হৃদয় কবুতর
শাদা পৃষ্ঠা অর্থ- মানুষ মানচিত্র ভাষা এবং
একটি অখন্ড ভালোবাসার বিস্তৃত প্রতিভাস

অচেনা আর্তস্বর

একটিও জানালা নেই দরোজা নেই সারা রাত সারা দিন
 এঘর ও ঘর তারপর লাইটপোস্ট গভীর ম্যানহোল
 তারপর সমুদ্রের গভীরে জলের পেখমে বাতাসের ওড়নায়
 অসম্পূর্ণ মানুষ এক বিকলাঙ্গ ভাসমান মেঘ বেয়ে অদৃশ্য
 গোলকে কারাহীন অসংখ্য গোলক তার বৃকে পাঁচটি পৃথিবী
 ষাট কোটি মানুষ অসম্পূর্ণ বিকলাঙ্গ খাদ্যহীন বস্ত্রহীন
 নক্ষত্রের পিঠে পাথরের চাষাবাদ পাথরের ফুল পাথরের পাখি
 সবুজ হীন অরণ্য অরণ্যের ভেতর ডোরাকাটা সৌখিন হরিণ
 ভরা বসন্তে নির্জন দুপুরে জোছনার উদ্যোগ শরীরে একান্ত পাহাড়ে
 জলশূন্য যে ভূমি তাকে কেনো জলাভূমি বলা এসব অলীক প্রশ্ন
 সত্য কেবল ন্নানরত একজন অসম্পূর্ণ বিকলাঙ্গ মানবী আর
 তার অশরীরি দেহ থেকে কেশ থেকে টুপটাপ ঝরে পড়া
 জলের ফোটা আতীর হংকার হংকারের ভেতর থেকে একদিন
 আরশোলা হটিতে হটিতে ইতিহাসের বৃকে আশ্রয় নিয়ে তারপর
 প্রগাঢ় ঘুমে সহস্র বছর প্রাস্টারহীন পড়া দালানের পেটে
 গভীর রাতে অন্ধকার ফেটে গমগম করে ওঠে ইটের হৃদয়
 হৃদয়ের ভেতর আছড়ে পড়ে পৃথিবীর জমাটবদ্ধ কান্নার ঢেউ
 ঢেউয়ে ঢেউয়ে ভেসে যাওয়া অসম্পূর্ণ বিকলাঙ্গ মানুষের আত্মা
 আহা পৃথিবী তোমার মতো একাকী নিঃসঙ্গ অসম্পূর্ণ মানুষ এক
 বাতাসের আড়ালে দাঁড়িয়ে কাদে কেবলই কাদে আর মানুষের
 জন্মের ইতিহাসের প্রতি বারবার শিককার এবং অভিসম্পাত
 ঝরায় কেন পৃথিবীতে একটিও জানালা দরোজা নেই কেন

প্রজনু এবং লাশ

ব্যক্তিগত উচ্চারণযোগ্য শব্দগুলো কুন্ডলী পাকিয়ে
বারুদ বিশ্বাসে বেলুনের মতো শূন্যে উড়িয়ে দাও
তাহলে বিষয় হতে পারে
নির্মিয়মান পৃথিবীর বাসযোগ্য জনপদ

খাটিয়াতে যে লাশ গোরস্তানমুখি
তিনিও ঘুরে দাঁড়ান
মুখ ফেরান স্বপ্নাত্তর প্রভাতের দিকে

আমাদের শব্দপুঞ্জ লাশটির চোখের দীপ্তি কি
ফিরে আসতে পারে
একটি জাফরানী প্রভাত

তা না পারুক
তবুও আগামীর লাশগুলি
যেন সন্ত্রস্ত হৃদয়ে গোরস্তানমুখি না হন-
অন্তত এই প্রত্যয়টুকু লাশটি পৃথিবী থেকে
নিয়ে যেতে চান
তাকে বঙ্গামঃ
হে সম্মানিত লাশ
গভীর রাতে আপনি মাঝে মাঝে এসে
আপনার ইচ্ছের কথা স্বরণ করিয়ে দিয়ে যাবেন

পাথর হাঁটছে

বিষপ্লের বোতলে অসহায় পৃথিবী

ক্রন্দনরত বৃষ্টিমুখর রাত

কুন্ডলী পাকানো বাতাসের সাঁ সাঁ শব্দের ভেতর

আচর্য কোরাসঃ

প্রজ্বলিত অগ্নিপিন্ডকে উপহাস করে এমন সাধ্য কার

ঈষাণ কোণে প্রতিবাদী সোলেমানী পাথর

চলমান পাথরের বৃকে অসম্ভব যৌবন

পায়ের পাতার নিচে অবিশ্বাস্য অন্ধকার

মাথার ওপর কাকের বিভৎস পালক

শকুনের চিৎকার

তবুও পাথর হাঁটছে

হাঁটতে হাঁটতে এশিয়ার পূর্ব গোলাধে

পাথর হাঁটছে

পাথরের বৃকে অলৌকিক যৌবন

হাতের আঙ্গুলে মানচিত্রের কারুকাঙ্ক

পাথর ঘর্ষণে জ্বলে ওঠে সূক্ত আগ্নেয়গিরি

জ্বলে ওঠে লাভার ফুসফুস

অদৃশ্য গোলক বেয়ে হাঁটছে পাথর

রহস্যের আড়াল থেকে ফেরেশতারা পাঠায় সালাম

পাথর হাঁটছে

যতদূর পাথর যায় ততদূর দূরস্ত যৌবন

যতদূর যৌবন যায় ততদূর দ্যুতিময়

দুধবতী গাতীর ওলান

কলাবতী ঢেউয়ের উৎসব

যতদূর পাথর যায় ততদূর অমর ভাস্কর্য
ভাস্কর্য বরনা হয় বরনা নিসর্গের নারী
পুলকিত শিহরণে দুলে ওঠে অচেনা বন্দর
অনাবৃত গুহার ভেতর শির শির হাওয়া
মাতাল বাতাসে পাক খায় গহন ঝিনুক

পাথর হাঁটছে

পাথর সম্মুখে পর্বত শৃঙ্গ
শৃঙ্গের জিহবায় ধ্বংসের ঘন্টাধ্বনি
চারদিক হতাশার ধূলি
পাতিল থেকে লাফিয়ে পড়ে উষ্ণ দীর্ঘশ্বাস
মাতৃগর্ভে নিজীব শুক্রকীট
আগত শিশুর শংকিত চিৎকারঃ

অভিশপ্ত পৃথিবীতে যাবো না আমি

সাহসী বারুদজলে মুখ ধুয়ে
সামনে দাঁড়ায় তীব্র পাথর
পাথর ঘর্ষণে খুলে যায় পর্বতের গুহা
রেকাব উপচে পড়ে দ্রোহের আশুন
ঝড়োকায় উড়ে যায় কঠিন ধমকঃ

সাহসের জিন ধরে

উদ্ধার মতো বেরিয়ে এসো পাথর সন্তান

মাতৃগর্ভে শংকিত শিশু

পিপাসায় চেটে খায় চাপ চাপ রক্ত লালা
জঠরের খুঁটি ধরে কেঁদে ওঠে কোমল হৃদয়ঃ

অভিশপ্ত পৃথিবী তো ভয়ের কারাগার

পাথর ভেদ করে উঠে আসে ক্রোধের ধিকারঃ

সাহসের জিন ধরে লাফিয়ে পড়ে শাপদ শিশু
প্রজ্বলিত অগ্নিপিন্ডকে উপহাস করে এমন সাধ্য কার

ধিকারে শিউরে ওঠে রোমশ গুহা
দু'দিকে সরে দাঁড়ায় পাললিক শিলা
চিৎ হয়ে প্রতীক্ষায় প্রহর গোনে অবসর কাতর নদী
রক্তের তরঙ্গ বেয়ে
সীতরে সীতরে কূলে উঠে আসে পাথর শিশু

পাথর কীদে না কখনো

পাথর হাঁটছে

পাথরের বৃকে অলৌকিক সাহস
যৌবনের নিঃশ্বাসে বহমান সুদীর্ঘ চূষন
চূষন নিঃশেষ হলে পৃথিবীতে থাকে না কিছুই

পাথর হাঁটছে

বিষগ্নের বোতল ভেঙ্গে
অন্ধকারের লাগাম ছিঁড়ে
প্রাচীর পর্বত সমুদ্র ডিকিয়ে পাথর হাঁটছে
পাথরের বৃকে অসম্ভব যৌবন

পাথর হাঁটছে

পাথরের সাথে সাথে যৌবন হাঁটছে
ক্রন্দনহীন জোছনা প্রাবিত রাতে
অলৌকিক পাথর থেকে ভেসে যাচ্ছে আর্চর্য কোরাসঃ

প্রজ্বলিত অগ্নিপিন্ডকে উপহাস করে এমন সাধ্য কার
কার

কার

কার

জ্ঞানান্তর

পাতার শরীরে তুমি
পাতার শরীরে ঢাকা চন্দ্র-সাঁকো
সাঁকো বেয়ে পার হয় রাত্রব্যাপী অচীন মানব

জলপরী স্বপ্ন দ্যাখে জলের ফোঁটায়
পংখিরাজে রাজকুমার দুলকি চালে-টালমাটাল
না চেনে সাঁকো সে- অবোধ বালক

পাতার শরীর থেকে নেমে এলে তুমি
ঝরে পড়ে একে একে প্রাস্টিক কভার
দুরন্ত বালক ছোট্ট আলগা গুহায়
পংখিরাজে রাজকুমার দুলকি চালে
টালমাটাল রাত্রব্যাপী চন্দ্র-সাঁকো

পংখিরাজে রাজকুমার দুলকি চালে- টালমাটাল
রাত্রব্যাপী
তারপর
সাঁকো চেনে গুহা চেনে
তারপর
ঘুম যায় দিনভর মোমের ছড়ি

পাতার শরীরে তুমি
পাতার আড়ালে চন্দ্র-সাঁকো কোমল কুটির
রাজকুমার সাঁকো চেনে গুহা চেনে
রাত্রব্যাপী
তারপর
দিবালোকে হয়ে যায় বংশীবাদক, কলের মানব

পালক ছাড়ার সময়

এই মধ্য রাতে ঝরে পড়ে শীতল হাওয়া
তন্দ্রাহীন বিছানায় জেগে থাকে শাদা কবুতর
এই রাত -কোন এক পালকহীন জোছনার শরীর

নামহীন গন্ধহীন কোন এক জোছনা
পালকহীনে নেমেছে বৈরাগ্য পৃথিবীতে
পৃথিবী দেখেছে তার ক্ষুধাতুর চোখেঃ
পালকহীন জোছনা কী মোহময়

তন্দ্রাহীন বিছানায় জেগে আছে কবুতর
টুপটাপ ঝরে পড়ে শীতল হাওয়া
ঝরে ঝরে ঝরনা হয়
ঝরে ঝরে নদী হয়
নদী থেকে উন্মত্ত ঢেউ

সমুদ্রের বুকে ভাসমান নাবিক
অনন্ত বিশ্বয়ে দেখে-
পৃথিবী পালক ছেড়ে সমুদ্রের কাঁচ-জ্বলা পানিতে
দাঁড়িয়ে একা

কবুতর জোছনা এবং পৃথিবী
এই মধ্য রাতে
এই তন্দ্রাহীন বিছানায় নাবিকের চোখে
সাক্ষ্য প্রদীপের মতো জেগে থাকা
এক টুকরো স্বপ্নের মিছিল
সহসা মিছিলে জেগে ওঠা খোলস ছাড়ানো আমার
আমগ্ন উচ্চারিত যৌবনের প্রিয় নাম-
'মানুষ'- এবং এক ফালি জ্বলন্ত 'বিপ্রব'

মৃদুল তুফান

দীর্ঘ নীরবতা ভেঙ্গে ফিরে দাঁড়ায় বিষণ্ণ ঝড়
টান টান রগের শিরায় নড়ে চড়ে বসে প্রখর সময়

সিক্কের পর্দার মতো ঝুলে আছে আধেক জোছনা
রাতের শরীর থেকে খসে পড়ে পিঙ্কল বসন
বৃষ্টির সম্ভাবনায়
রক্তের নদীতে লাকায় মাছের পোনা

চাপ চাপ বৃষ্টি পেলে রাত হবে পূর্ণ নারী
জ্ঞানাকিরা নিমগ্ন পাঠক
করাত কলের মতো একটানা সারারাত
সারারাত ভেজা ভেজা উচ্চাঙ্গ সঙ্গীত

বৃষ্টির প্রবল প্রার্থনায়
হাঁটু গেড়ে বসে আছে দীর্ঘ প্রতীক্ষায় নিপুণ কৃষক
চাপ চাপ বৃষ্টি পেলে রাত হবে পূর্ণ নারী
তারপর করাত কলের মতো সারারাত
সারারাত ভেজা ভেজা উচ্চাঙ্গ সঙ্গীত
টেউ টেউ মৃদুল তুফান

সংগীত: সঞ্জয়
সংগীত: সঞ্জয়

সংগীত: সঞ্জয়
সংগীত: সঞ্জয়

সময়

এই কি তোমার নাম- বেদনা
ফুস ফুস বেয়ে নামে, ধীরে নামে সন্তর্পণে
নাভির নিম্নভাগে, অবশেষে
ফুলে ওঠে ফুসে ওঠে প্রচণ্ড আক্রোশে
ইথারে ইথারে ভেসে যায় চিৎকার-
এই কি তোমার নাম বেদনা
উৎকর্ষা উলকি আঁকে
হৃদয়ের তন্ত্রী কাঁপে
কাঁপে ধর ধর, দিনভর
জীবনের ভাঁজে ভাঁজে একোন্ শব্দ বাজে
শুকিয়ে যায় কুপির সলিতা
জীবন জীবন বলে আজ
এই ভরা সাঁঝ
ডেকে ডেকে ফিরে গেছে
রেখে গেছে ঝুলিকাঁথা অটল ঘৃণা
এই কি তোমার নাম- বেদনা
কতটা সময় গেছে, বেড়ে গেছে বেলা
সায়াক্ সিঁথানে ঝোলে নিরস মৃত্যুর ফিতা
শুকিয়ে যায় কুপির সলিতা
মৃত্যু নিয়ে কে কবে করেছে খেলা
কেটে যায় কাল বেলা
কতটা রয়েছে পথ, কত কিছু রয়ে গেছে বাকী
ছলো ছলো আঁখি
গোধূলি সময়ে নড়ে, চেতনার নড়ে পাতা
সায়াক্ সিঁথানে ঝোলে নিরস মৃত্যুর ফিতা
এক দুই করে ঝরে যায় পাতা
ঝরে বার বার
এই কি তোমার নাম- বেদনা

ভিজে মাটির স্বাণ

পৃথিবী দাঁড়িয়ে আছে
বোগলে তার জমাট অন্ধকার

অন্ধকার ভেদ করে
নেমে আসেন উজ্জ্বল ইতিহাসসম দীর্ঘ পুরুষ
তার আগমনে ভারী হয় পৃথিবীর ওলান
সমুদ্র লাফিয়ে ওঠে
বারুদ ফেটে জেগে ওঠেন বিপ্লবী

অকস্মাৎ ফেটে যায় সমুদ্র বিনুক

পাখির পালক থেকে খসে পড়ে সাহসের বৃষ্টিঃ
ওরা শহীদ নয়
পেঁজা তুলোর মতো শুভ্র মেঘের পারদ
ওরা অদৃশ্য গোলকে ভাসমান বাতাসের হাঁস

তীর্যক চঞ্চু থেকে ঝরে পড়ে আশার বরফঃ
পৃথিবী শীতল হবে

ভিজে মাটির কোমল স্বাণে বেড়ে ওঠে বীজের জীবন

পিতামহের চেয়ার

এ চেয়ারখানা মূলত শূন্যেই ছিল।
ভাসমান নক্ষত্রের উপশিরা থেকে
বিচ্ছিন্ন হয়ে মেঘের নলকূপ বেয়ে
ঝরতে ঝরতে একদিন সমুদ্রের
নীলাভ তরঙ্গে আছড়ে পড়লো। তারপর
শূন্যে, অদৃশ্যে, অলক্ষ্যে গোলকহীন।
এ চেয়ারখানা মূলত শূন্যেই ছিল।
এ চেয়ারখানা মূলত টর্নেডো ছিল।
তারও অনেক পূর্বে মূলত মানুষ ছিল।
সময় নির্মোহ হলে তারপর একদিন
এ চেয়ার অদৃশ্য হলো অস্তিম গোলার্ধে।
তারপর মানুষ হলো।
তারপর অরণ্য হলো।
তারপর সমুদ্র হলো।
তারপর একদিন পৃথিবী থেকে দূরে।
এ চেয়ার একদিন মূলত পৃথিবী ছিল।
চেয়ার অদৃশ্য হলে মানুষ অরণ্যে গেল
সমুদ্রে গেল পাহাড়ে গেল
উদভ্রান্ত নক্ষত্রের বাহ থেকে মুক্ত হলো
সতেরো জোছনা
তারপর খণ্ডিত হলে চেয়ার
যুদ্ধ এলো, মহামারী এলো
মানুষ বিপন্ন হলো অরণ্য বিলীন হলো
সমুদ্র তরঙ্গহীন হলো।
এ চেয়ারখানা মূলত মানুষ ছিল।
অরণ্য ছিল। সমুদ্র ছিল।
এ চেয়ারখানায় আমার কথা লেখা ছিল।
তারও পূর্বে এ চেয়ারখানায়—
পিতামহের এবং পৃথিবীর ইতিহাস ছিল।।

নিদ্রামগ্ন পংক্তি

নিদ্রার কাফন ছেড়ে উঠে এসো রাত
পৃথিবীর হাড় থেকে ছিটকে পড়ুক উত্তপ্ত শিশির

মানুষ তো ভুলে গেছে ছায়ার সংলাপ
খেমে গেছে টুংটাং মানবিক সারগাম
নিদ্রার কাফন ছেড়ে উঠে এসো রাত
নিরালোক গহবরে সভ্য হোক ক্ষুধিত পাষণ

নিদ্রার বাঁধন ছিঁড়ে উঠে এসো রাত
নিঃশ্বাসে নিঃশ্বাসে হামাগুড়ি দিয়ে
নেমে এসো তত্ত্ব পিঠ বেয়ে সত্ত্বপর্গে
জনপদে স্পন্দিত শস্যের ক্ষেতে
গভীর বনারণ্যের সুদীর্ঘ সীমায়

বেদনার ঝাঁপ ফেলে উঠে এসো রাত
সুন্দর আঁধারে সভ্য হোক বিমর্ষ পৃথিবী

কণ্ঠতালু

কণ্ঠতালু ঘেমে ঘেমে অবিরাম বৃষ্টি
হলুদ বৃষ্টিতে যায়- উড়ে যায় সবুজ চিরগি
জীবনের চুলগুলো বড় এলো মেলা
বৃষ্টির হয়েছ আজ বিউটি পার্কার
কণ্ঠতালু ঘেমে ঘেমে সাতটি সরব নদী
নদীর চিতল আজ নিপুণ মাঝি
গোলাপের ধরে ধরে খোড়ল গহুরে
বেঁধেছে সুখের নীড় চতুর শকুন

কণ্ঠতালু বেয়ে বেয়ে উড়ে যায় ধূমল কসমেটিক
ঝিনুকেরা মুখ দেখে সিরামিক, কীসার বাটিতে
আঙুলের কাণ্ড বেয়ে আনত লতায়
জিত ঘষে মৃত্যুদূত অদৃশ্য উঠোনে

সারাদিন জীবনেরা ক্লিনিক চতুরে
সারাদিন কণ্ঠতালু পথে ঘাটে
অবশেষে অচেনা বন্দরে

মৃত্যুর দিকে

জীবনের মতো ভালবেসে মৃত্যু
পার হতে হয় সময়ের সীকো

মৃত্যু কি সন্ধ্যার রং
কিষা জীবনের মতো
তমসিত বাতাসের ঘোড়া

তবুও জীবন-

ভালবাসি মৃত্যুর মতো
ভালবেসে ক্রমাগত হেঁটে যাই
জীবন থেকে মৃত্যুর দিকে

বিরল বাতাসের টানে

একটি বৃক্ষের কাণ্ড থেকে আর একটি বৃক্ষের জন্ম হলে
অবাক পাখিরা এই অরণ্যের সৌখিন বাসিন্দা হবে
অথচ পৃথিবীর সম্মানিত বন বিড়াল বিপর্যস্ত সময়ের শিঙে
ঝুলতে ঝুলতে আরব্য রজনীর ঐতিহাসিক সত্যতা
নির্মাণে ব্যস্ত

রাজপথ ফুঁড়ে বেড়ে উঠলে শকুনের অশ্রাব্য গোঙানি
মৃত্তিকা সংলগ্ন হাড়গুলি সচকিত হন
প্রাচীন হাড়ের চাহনীতে সাতটি দোজখের কপাট ফাঁক হয়ে যায়
আর তখন শহরের সব ক'টি অট্টালিকা
হ্যামিলনের ইঁদুরের মতো কপাট ভেদ করে
দ্রুত ঢুকে যায় দোজখের গুহায়

প্রাচীন হাড়গুলি একত্রিত হয়ে জনসভা ডাকেন
শাদা শাদা হাড়ের গায়ে ফেরেশতার স্বতন্ত্র আচকান
পরনে পায়জামা
দ্রোহের সুগন্ধি মেশক ফুর ফুর করে উড়ে যায়

একটি অরণ্যের জন্যে, একটি সমুদ্রের জন্যে, নিষ্পাপ পাখির জন্যে,
একটি পৃথিবীর জন্যে প্রাচীন হাড়গুলি জমাটবদ্ধ হন রক্ত এবং
মাংসে

তাদের শরীর থেকে বিদ্যুতের বেগে ছিটকে পড়ে
ঈসা খাঁর তরবারি

তরবারি এবং অশ্বের খুরের ধ্বংস

ঝুলে যায় দুর্গম আকাশের সর্বশেষ খিড়কি

প্রাচীন হাড়গুলির অগ্নিময় কলস্বরে নফল নামাজ ভেঙ্গে
আমার পিতার অঙ্গীতিপর দেহ এখনো মধ্যরাতে যুদ্ধের মাদকতায়
অকস্মাৎ ধনুকের ছিলার মতো খাড়া হয়ে ওঠে

বিরল বাতাসের টানে

শেষ রাতের জ্ঞানাল

এই রাত কুমিরের মতো। সমুদ্র উপকূলে উঠে পিঠটান করে রোদ পোহাবে। আগামীকাল। আগামীকাল হবে নিঃশ্বিত অন্ধকার। সরব এসরাজ। হারিয়ে যাবে দিনের সূর্য। অনন্ত গুহায়। আগামীকাল। আগামীকাল মৃত মানুষের জনসভা হবে। জীবিত মানুষ হবে টেবিল ডায়াস।

সাড়ে তিন ফুট মানুষের পিঠ বেয়ে চলমান সড়ক। মহাসড়ক। কাঁধ বরাবর গিয়ে মৃত্যুসেতু। সেতুর ওপর অটোমেটিক গাড়ি। মানুষ ছাড়া গাড়ি। আগামীকাল। আগামী কাল সমুদ্রের জলরাশি উজ্জ্বল রক্ত। চন্দ্রডোবা। অমাবস্যায় শশ্যান-গোরস্তানে লাশের মহোৎসব।

আগামীকাল কোনো ভালোবাসা জন্ম নেবে না। কোনো ফুল। কোনো কুড়ি। কোনো শস্য। বৃক্ষরা কেঁদে কেঁদে নিরাশ হবে। মৃত্তিকা পাথর হবে। নক্ষত্র হারিয়ে যাবে। পাখিরা পথ হারাতে। আগামীকাল। আগামীকাল শরণার্থী পিপিলিকা সাতটি মহাদেশের কোথাও কোনো আশ্রয় পাবে না।

এই রাত কুমিরের মতো। হা করে বসে থাকবে। তার ভেতর গমনাগমন করবে মানুষের দুঃসংবাদ। ধ্বংসের চুরুট জ্বলবে। এইরাত। আগামীকাল। আগামীকাল পৃথিবী দুমড়ে মুচড়ে চারভাঁজ হবে। ঝড়ের দৈত্য চালিয়ে যাবে সহস্র ট্যাংক। লক্ষ মিশাইল। খইয়ের মতো ফুটেবে আগ্নেয়াস্ত্র তা তা থৈ থৈ।

আগামীকাল। আগামীকাল পান্টে যাবে জিওগ্রাফী। পান্টে যাবে এ্যানাটমী। ইতিহাস। অমর সঙ্গীত। আগামীকাল জন্ম নেবে অস্তিম ফ্রোড। জিঘাৎসার জেট বিমান। আগামীকাল হবে ডবল ডিমাই অফসেট মেশিন। হোয়াইট প্রিন্ট বাইকালার ছাপা। ভেতরে কংকালের সাক্ষাৎকার। আগামীকাল। রক্ত বৃষ্টির মধ্যে হেঁটে যাবে দুইশো পয়েন্টের ব্লাক হেডিং। কিছু স্ক্রীন। কিছু শাদা-কালো ছবি। অস্পষ্ট। ঝাপসা। অগণিত ভুল মুদ্রাক্ষর। তারপর।-

তারপর অশরীরি নিয়ন্ত্রণ পাঠকেরা অরণ্যহীন পৃথিবীহীন মানবহীন এক ভাসমান পাতালে অবগাহন করবে। ক্লাস্তিহীন। আগামীকাল। আগামীকাল সকাল হবে না। সূর্য উঠবে না।

কিন্তু তার পরদিন? তারপর? তারপর? তারপর?



বিরল বাতাসের টানে

মোশাররফ হোসেন খান

